



Aqqalu C. Jerimiassen

UKA 2025/18-1

Atassut

30. September 2025

Namminersorlutik Oqartussat Umiarsualivimmiinnermut aamma umiarsuarni takornarianik angallassisuni ilaasut akileraarutaat pillugit Inatsisartut inatsisaata allanngortinneqarnissaa pillugu Inatsisartut inatsisissaattut siunnersuummut saqqummiussissut.

Aningaasaqarnermut Akileraartarnermullu Naalakkersuisoq

Nunatsinnut takornariassaguit tamatsinnut pissarsiaqaataasariaqarputit, nunarput assigiinngitsutigut atuiffigissagukku pilliuteqartariaqarputit, siniffigisinnaassagukku tunniussaqaqfigisariaqarpat, taliffigissagukku tunilaarsinnaasariaqarpat, nuna tullaarisat aserfallattaalinissaanut iluaqutaasussamik pilliuteqartariaqarputit.

Ukiorpaalunngortuni Atassummiit aningaasanut inatsisissamik isumaqatigiinniartarnermi siunnersuutitigullumi qaqittuarterparput takornariaqarnikkut nunarput pissarsiaqarnerusariaqartoq.

Taannalu sulii attapparput!

Maluginianganngorput Atassummiit tassaavoq, Sikuki Harbour uani immikkut inissinneqarmat marloriaamminngooq akileraannginnissaq piniarlugu.

Piginnittuuneq pillugu isumaqatigiissusiortarnermi partiit sisamaasut akornganni isumaqatigiissutaasumi ilaatigut atsiorneqarmat eqqaaneqarnikuuvoq, Sikuki siunissami qaninnermi Royal Arctic Line A/S-ip ataanut inissikkiartuaarneqassasoq marloqiammik allaffissornerujussuaq A/S-erpassuarnillu pisortat pigisaanik ingerlataqarneq millisaaviginiarlugu.

Taassumap avataanut peqqilaariaraanni, Atassummiit nuannaarutigaaqarput, kiisami takornariaqarnikkut ilumut siunertat taamak ittut qallorneqarlualermata, tassami 2014-imi pax tax peerluinnarneqarsimanera kukkunerusimasooq nassuerutigisariaqarparput.

Maannalu eqqunneqaqqinnikuunerata kinguneri nueralereersut takusinnaavagut, naak akeqalereeraluartooq sulii umiarsuit takornariaqartaatit tikerartuarpuit ikileriaratik, taamaattumillu pissusissamisuunnarpoq tamanna nangittumik nalimmassaavigineqarnissaa.

Avatagiisillu eqqarsaatigalugit, Atassummiit pingaartilluinnarparput, nunatsinnut umiarsuarsuit takornariaartaatit tikittartut pinngortitamut avatagiisinullu annerungaartumik akitsuuserneqartarnerat inissimasinnaasoq, issittummi imartaa pinngortitaalu malussarsissuuvoq, taannalu paarilluarnerunissaanut annertuumik tamatta pisussaaffeqarpugut.

Nuummilu talinnganermi umiarsuarsuit takornariaartaatit motoritik qamillugit sarfamut ikkuttussaataitaneri Savallimmiuni atuuttoq assigalugu nunatsinni periarfissat qinerlerneqartariaqarnerissaaq innersuupparput.



Illoqarfiillu allattaaq erngup nukinganik nukissiuuteqarnikkut inerisarneri malillugittaaq nukissaq tunniussinnaasaq naammatsippat tamanna piumasaqaatigisariaqalerparput.

Minnerunngitsumillu talittarfeqarnikkut naammaginartumik sinerissap sinnerata malinnaatikkiartuaalernissaa pisariqarpoq, qitiusumiillu tamanna aaqqiivigineqarsinnaanngippat kommunit nukissaqarsorippata talittarfiit tunniussinnaasariaqarpagut qitiusumiit oqartussaaneq peerlugu, kommunillu namminneq umiarsuarnut takornariartatinut akigitikkusutatik atorsinnaalissavaat.

Annertusarneqaqqissinnaanera umiarsuarnik takornariartaatinik tikinneqartarnitta takorlooruminaappoq maanna, tassami nammassinnaasatsinnik ineriartortitsisariaqarpugut, takornariaqarnermullu inatsisip atuutsilivinneqarnissaanut ukioq ataasiinnannguliivimmat pingaartuuvoq nalimmassareertariaqarnerput nunaqqatigut takornarialerisut eqqarsaatigalugit.

Avataaniit soorunami suleqateqarsinnaaneq mattutissanngilarput, aqutsinngiinnassuarpulli taakkunannga.

Umiarsuit takornariartaatit tamatsinnut pissarsiaqaataanerat malunnaatilimmik aaqqeeqatigiiffigisariaqarpagut, allaammi maannamiit imartatsinnut pineranniilluunniit avatagiisinut tunngatillugu taxa meteriusannguamilluunniit peqartissinnaasariaqaraluarpagut sunniutai imaannaasanngimmata.

Kangerluit assigiinngitsut takornariaqarnermut inatsisikkut zone-lersorneqarsimasut eqqarsaatigalugit, takornariartaatsit pulanerminnissaaq tamakkununnga immikkut akitsuummik peqartarsinnaanerani eqqarsaatersuutaasinnaanerpa? Uani pineruara, gummibâdinik maangaannaq niooqqaasitsinnginnissaaq, tassami akeqartitsinikkut umiarsuarsuarnut zonenut pulanermi, tassani pulanissaraluat pinngitsoortikkaanni sumiiffimmi takornarialerisut atorneqaannarsinnaammaa, taannalu aningaasanik avataaniit isertitsinermi sumiiffimmullu toqqaannaq iluaqutaalissalluni.

Sorpassuusinnaagaluqaat taasinnaasagut Atassummiit.

Taamatulli oqaaseqarluta uana siunnersuut sulii pitsaanerusumik iluseqartissinnaarusullugu aappassaaneerneqartigani Inuussutissarsiornermut Aatsitassanullu ataatsimiitsitaliamut innersuupparput.